

三怡堂叢書

孟有涯集

十六

三才圖會

卷之四

五

孟有涯集卷之四

信陽孟洋藎

七言古詩十八首

鴈門太守行

鴈門城中人阻飢  
鴈門城外胡馬馳  
太守從來賢者誰  
濟南太守今何爲  
往年有田耕未得  
今日耕田田可食  
救死年年嗟苦辛  
講武而今尙餘力  
郡中政美風俗移  
山中草長牛羊肥  
邊城百里塵不飛  
太守不來民疇依

人日

去年人日潁水濱  
今年人日長安上  
白雪清尊憶故人  
長

煙平樹空遙望苑外寧無楊柳新水邊不見梅花放天南  
地北總支離瘦馬東風倍惆悵

漢宮詞

憶昔妾當二八期正是漢家全盛時九重下詔擇鸞匹萬  
國求賢配鳳姿妾身自分非良質百萬人中叨第一天子  
親迎出殿廷輔臣持節下蓬華蓬華輝光異昔年絲蘿延  
蔓從今日始知貴戚失金張不許王侯論甲乙一入金門  
侍至尊柰何相見不相言紅顏未必招人妬薄命何堪承  
主恩主恩深重應難報妾意殷勤那復論一別謝君面往  
駕無旋轅夜夜看星回永巷朝朝望日倚長門長門永巷

春風起萬卉千花鬪芳紫燕子飛過密杏中黃鶯啼向垂  
楊裏鶯鶯燕燕各相依戲蝶遊蜂兩兩飛可憐今日春光  
好可惜明朝春又歸鳳輦常時遊上苑羊車無日到重扉  
豈干侍御還多寵自是君王有萬幾萬幾閑暇甘遊獵朝  
出城南暮城北金鞍玉騎走千軍羽箭琬弓墮雙翼陌上  
風光自可嘉宮中粉黛無顏色離宮一萬所別殿九重深  
豈有容華希寵愛更求詞賦感君心何人可托黃金贈薄  
情不見白頭吟珍珠簾下閑歌舞且取歡娛謝愁苦自愛  
瓊簫引鳳凰自愛金杯度鸚鵡鸚鵡性能言不得到君前  
一朝被籠絡翠羽徒自憐不沐君恩奚足惜不見天顏心

未憚天下昇平至萬年妾身生死良何益

刈麥行

五月五日麥盡黃北阡刈麥東阡忙家家男婦聚如堵赤  
日中天汗成雨禾藁登場宜自歡奈何相顧反愁嘆深耕  
從昔望豐稔疾風搖落半枯乾枯乾太半稅不足況是年  
來無積粟一春不雨復于茲今歲秋成寧可期舉家俯仰  
失依倚官府索錢猶未已盡力窮年總爲公貧餓雖生不  
如死須臾言罷各潛然始信農夫多苦艱車馬饗餐竟何  
事使我聞之益厚顏

再過政平飲王介卿宅

七月七日王子宅舉酒談兵對秦月深坐那知河影移醉  
歸不覺鷄聲發萬里重來慰所思秋風恰過中元期人生  
會合亦常有不用臨歧嘆別離

壽邵黃門母

堂前秋菊黃金枝堂上慈顏頭白垂雲天青鳥下高宴西  
降王母從瑤池繁吹劇舞風日動酒長樂侈山海移母家  
仙郎青瑣客玉貌翩翩健雙翮衮職平明侍內庭封事日  
昏回左掖却憶常年壽宴開彩衣晝舞北堂隈今歲清秋  
逢此日退食臨風望雲立長山遠水隔承歡況喜高年當  
七十裂素揮毫開畫圖明珠光錦出文襦玉桃歲獻蓬萊

苑紅日朝升滄海隅再拜征鴻遞鄉郡丹青白髮常相近  
千里長安遊子情慈闈宛若聆音問感君盛事萬人傳一  
欲登堂不可攀丈夫顯親在霄漢豈必跼蹐庭闈間

送洗侍御歸養

祿食不代養繡服詎爲榮悅親已奮青雲翼久宦能忘烏  
鳥情再疏朝承內庭旨孤帆暮下長河水越王臺上起秋  
雲目極歸心八千里江花明江草新畫呈彩衣舞春醉白  
頭人千金不買堂上樂萬乘難招膝下身君不見世人競  
取拖金紫厚祿徒將飽妻子

舟過城陵磯悼內兄舊巴陵尹



巴陵原上秋草沒岳陽城頭挂殘月嘆逝中宵懷不開江  
流嗚咽江猿哀昔行縣中花今餘道傍柳可恰勁節胡爾  
爲徒取虛名在人口朝雲爲雨暮歸山秋燕辭巢春復還  
青山玉骨何時起鬼火妖狐滿蒿里思君懶入巴陵遊巴  
陵道古生百憂

瀟湘行

歲暮浮瀟湘天空豁心目霽日千林開高雲萬峰簇江色  
巖霏水郭隈垂蘿飛幌隱樓臺疎松野寺鐘磬響枯葦沙  
洲鴻鴈哀風煙奕奕紛奇狀海賈湖商日流盪浣婦新粧  
映綠波漁人密密拋洪浪年年歲歲此江津今日人過非

昔人曾聞埋沒屈原骨不復飄零賈誼身楚王宮中罷歌  
舞十二峰頭泣雲兩岸上誰家越女謳珠簾羅幕桂堂幽  
江南本自山川勝日暮其如客子愁當昔孫吳漢昭烈衡  
湘轉戰江流血功臣名將已寂寥石碑銅柱俱淪滅秦皇  
威力震羗胡仍迴車駕徧寰區馳道至今瀟水上秋風惟  
見白雲孤白雲孤以飛湘水自南下安得從之亦北旋東  
園種竹耕西野

送平樂李太守致仕還汝陽

桂水生炎雨湘山暗夏雲他鄉一見面明日復離羣垂楊  
萬縷縈愁思芳草萋萋爾何意須臾日暮孤帆開別酒千

鍾那得醉昔乘五馬中原來今日還乘五馬歸神明太守  
有高譽奔趨白首奚爲哉君不見秦時丞相顯泣顧中兒  
憶黃犬君不見漢代淮陰強後車仰嘆良弓藏曾參殺人  
惑慈母董龍誰敢呼雞狗樊籠一躍天地寬榮辱縱橫我  
何有憐君髮鬢猶未絲五湖三徑將安歸清泉白石滄洲  
夢赤日紅塵誰是非吾州山水連君縣我住君還淚如綫  
搖搖旌蓋過吾間我有雙親君得見

桂樹行奉壽西巖先生

西巖桂樹青瑤枝花開八月黃金垂西風吹花渡海水天  
香散入蓬萊池蓬萊仙人冰縠衣手揮玉塵飛瓊后青童

翠女雜歌舞鳳簫龍笛吹參差洪崖擊掌廣成笑長安游  
宦嗟年少柱下逃名名始聞金門晦迹光逾耀更乘五馬  
適溪山何似青牛入漢關千言不博萬鍾粟至今大道留  
人間桑田已見成滄海玄髮朱顏猶未改鯤轉鵬翻復幾  
時吳宮晉闕今何在惟有西巖桂樹根不移年年歲歲花  
相待密葉長條凝紫煙江山轉見生光彩

題宋徽宗杏花錦雞圖

北風十月登華堂堂上春光照花樹雪壁熒熒絢綺霞晴  
煙拂拂流香霧彩筆誰將奪化工珍禽豔萼披霜素洛陽  
殿前仙杏開錦雞石上矜毛羽出羣畫手近代無趙宋徽

宗爲此圖規規模寫不足數生意真與乾坤符煙枝露蕊  
宛堪折戢翼回頭如有呼上林韶華竟何似滿堂醉眼俱  
模糊 國朝畫者稱林良古松蒼鷹乃所長後有呂紀善  
畫鳥形象雖工神色少帝王妙思非等閑意態不在丹青  
間定知萬里胡沙外貌得關河北鴈還

天馬行同唐荆川太史游普濟寺作

風催白草霜葉丹嶙峋黛色標南極晨起衝寒恣攀陟捫  
蘿策杖嗟無力林壑陰森逕轉廻赤霞掩映青蓮開殿閣  
參差翠微畔黃金作戶玉爲臺玉臺金戶通流水門外孤  
峯插天起徃徃飛花下石壇啣啣馴鹿臨崖浹修竹長松

煙雨間鳴琴對奕醉忘還回首氤氳渺城市悠然身世非  
人寰江東才子金閨客遙下天門飛漢節覃恩中土煥堯  
文覽勝南州探禹穴嵩高伊闕剩遨遊淮汝風煙亦暫留  
校書懶臥揚雄閣作賦常思王粲樓山中載酒摘毫素盡  
日謳吟倚雙樹飛泉寒谷生光輝珠宮畫壁流雲霧蹊路  
欣看天馬過駑駘學步愧蹉跎凌風逐電燕臺去懸想瑤  
階響玉珂

風木歌

風木悲宿昔哀鳴復今茲媚川繡野無顏色垂簾浮棟若  
愁思春風往日長安道絃管高堂壽雙老靈椿日映千年

枝丹花露浴忘憂草仙鳥飛去還復來蛺蝶雙雙拂羽杯  
寧知歲暮寒飈及零落韶華空草萊入林鳴鳥哀何切覆  
屋浮雲陰不開堂前桂樹秋花紫萬里香風未云已有祿  
不及親在時天涯涕淚傷游子感君哀思爲君歌風驚木  
撼奈若何

松栢行爲洞雲張封君雙壽

松栢不生塵路側托根矯節崑崙巔道遠材高不可致工  
師仰嘆空垂涎洞雲老翁避世賢蒼松翠栢同清堅見客  
常持伏羲易閉門卻草揚公玄弋雁歸來但飲酒白頭相  
待如賓友琴瑟在傍歌在口滿庭兒女牽衣走甘貧無乃

梁鴻妻樂隱真偕老萊婦卽有君恩金紫榮杖藜不廢看  
南畝遊子金陵宦未回望雲時上鳳皇臺陶公山前鶴雙  
下賀監湖邊花並開欲窮海錯供春饌更接江湖益壽杯  
大孝由來不貴養匡時實藉英雄才

送周玉巖侍郎入賀 萬壽節

炎天水閣高雲垂陰陰碧樹鳴黃鸝奏簫伐鼓振林木送  
客維舟白日移衣冠江上同稽首仰看文星朝北斗客行  
直上 大明宮拜舞歡呼萬年壽萬年 天子堯舜同華  
夷皞皞樂時雍光輝幸際中興日禮樂欣瞻上古風憶在  
先朝不得遇竄身嶺海迷煙霧日月重開二十年長安



文物今非故余亦同君近侍臣白頭飄泊厭風塵中朝故  
舊能相問欲臥滄江老病身

送僉憲李君惟大入關中

秦中昔遊地西望送行旌雨雪經淮甸春風入洛城洛陽  
城中足高彥君過故里多歡宴天津橋邊新柳絲桃林花  
煖啼鶯徧紫氣函關路青蓮華嶽祠五陵富貴空流水四  
塞煙塵異往時使君按節行風俗白日青雲照幽谷雲陽  
縣前涇水深召公亭下春蕪綠中興天子緩刑威四海謳  
歌仰德輝從容攬轡長安道早晚風聲達紫微

題竹山